

VLA, Urk. 8398 vom 5.12.1522

Transkription:

Ich Jörg Wehinger zu Tornbüren im Oberdorf gesessen vergich öffentlich für mich und alle mein erben und tun kund allen mencklichen mit disem Brief daß ich mit wolbedachtem sinn und mut recht und redlich verköft und ain staten ewigen kof zu koffend geben hann und geben kraft deß Briefs an die Gestift und Pfrond der Früenmeß zu Tornburen ain pfund pfennig Ewigs Zinß und geltz von usser und ab minem aigen Huß und Hofstata da selbs im obern Dorf gelegen stost fornen an die Landstraß ob an die Gassen hind an Jacoben Fussenegger undan an Eberliß Ulrichen ab grund ab grat ab steg ab weg ab hus, ab hofstat und all allen Iren rechten und zu gehörd nutz ußgenommen noch hydan och vormals Ledig und loch Dan hyndan gesetz miner gnedigen Herschaft von Österich nün Haller Lechen stür sust unbekumer von aller mencklichs Dar umb Hand mir gegeben und bezat ain gantze Gemaind zu Tornbüren zwaintzig pfund pfennig alß bar gäter müntz und werung der ich von Inen wol gewert gar usgericht und bezalt bin nach minem nutz und willen Hir umb söllend ich und alle min Erben und In welcher Hand und gewalt Dyß min Huß und Hofstat ymer komet Der pfrond und gestift der Früen zü Tornbüren Daß ain pfund pfennig Järlichß Zinß alle Jar Järlichß och yedeß Jarß allain und besonder richten und geben ainem früen messer older sinen gewalt zu Tornburen uff sant martin tag acht tag for ald nach ungevarlich und zu Iren sichren Hand und gewalt antwurten und geben für alle aller mencklichß Entweren namlich one allen Iren costnnen und schaden Dan welches Jarß ich all min Erben dar an sümmig würdind und disen Zinß nit richtend und gäbind wie vor geschriben stat So ist und Haist Daß vorbeschriben Huß und Hofstat mit aller Iren Zugehörd Zinß Fell und Der früen meß aigen dizz güt von mir ald minen erben och von aller mengklichß recht gut getrűw weren Haissen und sin für all abgang und schaden uff allen geruchten Mir ist die gnad getan daß ich ald min Erben disen Zinß wol wider ab koffen ald lösen mögend wenn wir wond ald műgend mit dem Hobtgut und ergangnen Zinß uff Den Zinß tag wenn nit Endrung In der müntz ist ungevarlich und Und Deß zu warem urkund so hab ich Jörg Wehinger mit Fleyß gebetten und erbetten Den ersamen Cristan Ruschen Der Zyt Aman zu Tornbüren Daß er sin Aigen Insigel für mich und min Erben öffentlich hat gehenckt an Disen Brief Doch Im und sinen Erben och ainer gnädigen Herschaft von Österrich one schaden Der geben ist an sant nicolaß aubent deß Hailigen Bischofs Nach Cristy geburt Im Fünfzechens Hundert und zway und zwaintzigosten Jar.

Rückseite:

Zinßbrieff der Früemesß zu Dornbüren Von Georg Wechingern P 1Ibd
1522. 5. December
Zinst Martin Ilg